



Sesida dal

1. da settember 2020

Communitgà ils

7 da settember 2020

Protocol nr.

721

Incumbensa Thomann-Frank

concernent la creaziun da las premissas per l'utilisaziun futura da la transfurmaziun
tar ils interprendiders

Resposta da la Regenza

La transfurmaziun structurala è ina sfida, da la quala las interpresas ed il chantun s'occupan constantamain. Las interpresas èn dumandadas da concepir lur models da fatschenta uschia, che las pretensiuns futuras pon vegnir ademplidas. A medem temp èsi ina incumbensa centrala dal chantun da metter a disposiziun cundiziuns generalas attractivas per las interpresas, per che quellas possian sa sviluppar en moda competitiva e per ch'i dettia novas plazzas da lavur. Per quest intent dovran las interpresas da tut las branschas economicas in ambient giuridic che las conceda ina libertad d'agir d'interpresa e che las permetta da transfurmar lur fatschenta e da la concepir tenor ils novs basegns da la clientella.

La pandemia da COVID-19 vegn probablamain ad accelerar la midada structurala da l'economia. En quest connex ston ins er vesair las mesiras che la Regenza ha gia prendì per dumagnar las consequenzas economicas da la pandemia da COVID-19. Las differentas mesiras immediatas per mitigiar las consequenzas economicas da COVID-19 ch'il chantun ha prendì (p.ex. garantias solidaricas chantunalas, fond per cas da direzza) han gì la finamira da mantegnair il chapital existent da l'economia publica en vista a la perdita da dumondas a curta vista e da garantir l'existenza da las interpresas e da lur plazzas da lavur. A media fin a lunga vista vegn il focus mess sin mesiras per ir enturn cun la midada structurala accelerada e sin mesiras per rinforzar en general l'attractivitat da l'economia locala dal chantun. La finamira è quella da gidar a lunga vista ad augmentar la capacitat d'innovaziun e la resilienza da las interpresas sco er a diversifitgar la structura economica.

Tar ils puncts a e b: Per quest intent èn vegnidas incumbensadas il zercladur 2020 las organisaziuns da tetg da l'economia grischuna (incl. la Societad grischuna dals impressaris constructurs), il Forum economic dal Grischun sco er la Cuminanza d'interess per il turissem en il Grischun d'elavurar las basas strategicas necessarias per sviluppar mesiras d'impuls a favur da l'economia grischuna. Ulteriuras represchentantas ed ulteriurs represchentants da l'economia e da las interpresas pon vegnir integrads tenor basegn e tenor project. En il rom da questas lavurs è gia vegnida fatga in'analisa fundada d'eventuals scenaris. Questas lavurs vegnan adina puspè actualisadas tut tenor il svilup da la pandemia.

Tar ils puncts c, d ed e: Las cundiziuns generalas meglieradas e la creaziun da plazzas da lavur stattan en il center da las ponderaziuns che vegnan fatgas en ils programs d'impuls menziunads. Las mesiras structuralas ch'èn vegnidas prendidas oravant tut a lunga vista, han la finamira d'augmentar l'attractivada da l'economia locala dal chantun. La fundaziun dal Tecnoparc Grischun, che ha gia gi lieu, è mo in exempel per quai. L'orientaziun da las mesiras tenor las trais dimensiuns da la persistenza è ina norma essenziala per la Regenza per metter las prioritads strategicas.

Tar ils puncts f ed i: Cun ils instruments da promoziun che sa basan sin la Lescha davart il svilup economic sco er sin la Lescha davart la promoziun da la transformaziun digitala, posseda il chantun las basas legalas necessarias per dar impuls finanzials per che las interpresas investeschian en la transformaziun (digitala). Però las mesiras pon mo vegnir promovidas, sche las interpresas ed ils furniturs da prestaziuns inizeschan projects correspundents. Il chantun surpiglia qua la rolla da dar sustegn.

Tar il punct g: La colliaziun cun las mesiras federalas e cun ils programs federals è garantida. Sco exempel sajan menziunads qua ils systems d'innovaziun regionalis cun la stretga colliaziun cun Innosuisse ubain l'orientaziun da la strategia d'innovaziun chantunala a la rait da Switzerland Innovation. Interpresas interessadas cun projects che han bunas perspectivas survegnan in sustegn per s'integrar en raits e programs nazionals.

Tar il punct h: Cun il concept da promoziun «Bindel ultralad Grischun» ch'è vegnì deliberà da la Regenza il november 2018, è vegnida creada la premissa per ina avertura conferma als basegns ed è vegnì lantschà il svilup da furmas da lavur impurtantas per l'economia regionala.

Sa basond sin questas explicaziuns propona la Regenza al Cussegl grond da midar questa incumbensa sco suonda:

Per responder questas dumondas e per sviluppar eventualas soluziuns coordinescha la Regenza in barat tranter interprendidras ed interprendiders grischuns. Per quest intent duain vegnir evaluads e priorisads ils potenzials da las interpresas en consequenza da la pandemia dal coronavirus (p.ex. prolungaziun da la chadaina da creaziun da valur tras in insourcing intermanaschial) e duain vegnir examinadas eventualas instituziuns responsablas adattadas.



En num da la Regenza

Il president:

Dr. Chr. Rathgeb

Il cancellier:

Daniel Spadin